

Rau Ite Imin Ru Tau Paulus Iboode Pa Timoti 2 Timoti—2 Timothy

¹ Yau Paulus. Maaron itaghon tauu loolo ve ighur ghau namin mbanjoona to Yesu Krisi. Leso navotia saveen mbuaan tooni pa tamtamon ve napaghazonai zi pa lepoogh poia tau i ighe igham pazi. Lepoogh tawe, yes tau tipaak Yesu Krisi ve tileep ila tooni, ta pale tighamu.

² O natug Timoti, yau lolog igheen tsio kat, tauta nabood rau tane ilat payo. *

Poia to Tamaan Maaron ve Tiina toit Yesu Krisi izaa tsio, ve lolozi isaghatin ghom ve tiuul ghom, ve tingin ghom uleep poia toman lolom luuma. Onoon.

Paulus ipariaan Timoti to iyooz ariaan ve ivotia vaaru poia

³ Yau nabesbees pa Maaron ve nataghon ngar tau nawataghi ila lolog naghe ene ingalaan mon ila i maata, imin muun tibugna tighamghamu. Ve mbon mataaz, matag ingalngal ghom, ve naghurghur ghom ila sunuun tsiau, ve napapait Maaron toman lolog poia pa ngar poia tau yo ughamghamu na. *

⁴ Yau matag ingal imuul ila pa saawe tau ituru tavapuli ghiit, ve naghita tanjiz tsio tomania matam suuru. Tauta napasawal payo naghe

* **1:2:** Mban 16:1+; 1Tim 1:2 * **1:3:** Mban 22:3; Pil 3:5+

naghit ghom rigta, o igham ghau lolog poia le poia kat.

⁵ Ve naghram n̄gar paam pa gabuam tau yo ughur ila to Krisi kat toman lolom. Yau nawatagh: Ghuruun̄ ila tsio, ene gabua tauu, imin to timum liva Lois ve tinam Yunis. *

⁶ Tauta naghe napaburigin ghom muul. Leso n̄gar ve tapiri tau Maaron ireii payo na igheen sorok sov, ve ugham uratoini le ivot imin tiina, imin tamtamom tiviv yav gha ighan tiina. Maaron igham tapiri ve n̄gar tana payo, indeen̄ saawe tau naghur nimag izala pavom na. *

⁷ Yo uwatagh: Avuvu tau Maaron igham pait na, ene irau igham ghiit taroi mako. I ipapalot ghiit. Leso tan̄gin tauun poi, tayooz ariaan̄, ve loloon pa tamtamom ve tagham poghani zi. *

⁸ Onoon, aazne tighur ghau naleep ila ruum to yavyavuun̄ loolo pasaa, nataghon Krisi. Eemon n̄gar tau tigham payau ne, mayam pani sov. Ve mayam pa votiaan̄ vaaru poia to Tiina toit sov. Yo aat upariaan̄ saveen̄ tooni, lesom tamtamom tighur ila tooni. Ve ugham tapirim ila to Maaron, ve uyooz ariaan̄, ve ubaad patañani pa vaaru poia imin yau. *

⁹ Maaron, i igham mulin ghiit, ve ipoi ghiit tamin le, lesom tataghon n̄gar patabuyaan̄. Ve iit tagham n̄gar poia eta, ta i ipoi ghiit pani ne mako. I itaghon tauu loolo, ve poia tooni. Muun̄ kat, saawe tau gabua eta ivot soone, i maata in̄gal

* **1:5:** 2Tim 3:15 * **1:6:** 1Tim 4:14 * **1:7:** Ro 8:15 * **1:8:** Mk 8:38; Ro 1:16; 2Tim 2:3, 4:5

pataghaan] ighe igham poghania iit tamtamon tau tapaak Krisi ve taleep ila tooni. *

¹⁰ Ve aazne, Uleenja toit Yesu Krisi izilam taan, gha ipaghazonjai poia to Maaron tawe ivot ighazonj, ve ipasov mateegh tapiri wa. Vaaru poia ipaghazonjai ghiit pa eez to tagham lepoogh poia ila to Maaron ve taleep mataan yaryaare le alok. *

¹¹ Maaron ighur ghau namin mbanjoonja tooni. Leso navotia vaaru poia tane pa tamtamon, ve napaghazonjai zi pani. *

¹² Puughu tane ta aazne nabadbaad patajanani naol. Eemon naroi mako, ve mayag mako. Pasaa, yau nawatagh Neer tau naghur ila tooni ne, tauta naghur ila kat naghe: Vaaru poia tau i ighuru ila nimag na, i tauu pale ingin poghania le irau saawe to imuul ilam. * *

¹³ O Timoti, saveen poia tau uloonja ila yau avog, ene itotoi ghom pa saa saveen tau yo aat upaghazonjai tamtamon pani, lesu ghuruun] ila toozi iyaryaan ve lupuun] to Krisi ilaan poia. Tauvene matam kisini ve utaghoni. Ve upaak Yesu Krisi ve uleep tunja ila tooni, ve ukis ghuruun] ila tsio ariiaan, tomania njar to loloon pa Maaron ve tamtamon. *

¹⁴ Vaaru poia tau ilat nimam na, ene gabua tauu. Tauvene matam pani ve ungin poghania. Avuvu

* **1:9:** Ro 8:28; Ep 1:4, 2:8+; 1Tes 4:7 * **1:10:** 1Kor 15:54+; Hib 2:14+ * **1:11:** Mbanj 9:15; Ga 1:15+; 1Tim 2:7 * **1:12:** Eez ite to tator saveen] ziiri tane, ene vene: 'naghur ila kat naghe: I pale ingin poghani ghau le irau saawe tau imuul ilam. Pasaa, yau naghur taug ila niima wa'. * **1:12:** Ep 3:1+; 1Pe 4:19 * **1:13:** 2Tim 3:14+; Hib 10:23

Patabuyaņ tau ilepleep ila loloon ne, aat ipalot ghom, leso ugham tauvene. *

¹⁵ Yo uwatagh: Zetaanņa to taan sirivu to Asia, tISOV tighur murizi payau wa. Zeran tawe, toozi ru, ene Pigelus ve Ermogenes.

¹⁶⁻¹⁷ Eemon Onesiporus tomania yes tau tilepleep tomania ila ruum tooni na, Maaron aat loolo isaghatin zi ve iuul zi. Onoon, aazne yau nalepleep ila ruum to yavyavuun loolo, ve tikau nimag ve agheg pa sen. Eemon Onesiporus iroi mako, ve maaya payau mako. Saawe tau ilam Rom, i iliil ghau lee ilam ivot tsiau. Ve saawe naol, ilam igigig ghau, ve ipapalot ghau, ve iuluul ghau. *

¹⁸ Ve yo uwatagh: Muun, i iuul ghau kat izi nugh Epesus. Tauta naghe Mbon Murei, Maaron pale loolo isaghatini ve igham mulini.

2

Timoti irau iyooz ariaan pa badoon patanani

¹ Tauvene natug Timoti, matam inġal poia to Maaron tau taghamu ila to Yesu KriSI na. Leso ipalot ghom ve uyooz ariaan.

² Ve saveen isov tau nasavia ila eval tiina matazi ve yo uloonņa na, usakia ila pa tamtamon siriv tau yo ughit zi ughe yes tirao, ve unumeer zi ughe yes pale tinizi ibees pa uraat to Maaron. Leso anazi tipaghazonņai tamtamon siriv pa saveen tana, ve uraat to vaaru poia iseenņa taghon gha ila. *

* **1:14:** 1Tim 6:20 * **1:16-17:** Mt 25:36; 2Tim 4:16; Hib 13:3

* **2:2:** Tit 1:5

³ Uraat to votiaan Krisi vaaru, i le patañani. Tau-vene yo aat upaak ghei ve itinja tabaad patañani tane. Leso umin zaaba poia ee to Yesu Krisi. *

⁴ Yo uwatagh: Yes zaaba matazi ilala pa uraat ite paam imin tamtamon siriv ne mako. Yes tileep ila uraat to malmal mon. Leso tigham daaba toozi lolozu poia pa uraat toozi. Yo irau ugham tauvene paam.

⁵ Tamtamon tau ighe ilaan pa parlosaan tiina, i aat itaghon tutuun to parlosaan, o irau igham atuya poia to yes tau tiliiv na. *

⁶ Ighe saawe to yaun aniin anoonja ivot, ene aat tighur ñeer tau igham uraat tiina pa vazoghiin aniin na le aabu imin maata, o iduduun. *

⁷ Saveen palelaan tsiau naol tane, isaav ighe ugham ngar pazi poi, ene aat Maaron tauu ipagha-zonjai ghom pa puughu. Leso uwatagh saa ngar tau yo aat utaghoni.

⁸⁻⁹ Matam ingal Yesu Krisi irau saawe. I ivot ila sinj to kinik David. I imaat, ve Maaron ipaburigini pa mateegh. Yau navovotia vaaru poia tane pa tamtamon, tauta nabadbaad patañani, ve aazne nalepleep ila ruum to yavyavuun loolo, ve tikau ghau pa sen imin yau ñeer saghati ee. Eemon saveen to Maaron, yes irau tipoon eez pani ne mako. *

¹⁰ Tauta nayooz ariiaan, ve nabaad patañani isov tau igham ghau ne. Pasaa, yau naghe nauul yes tau Maaron isiigh zi timin i le na. Leso tipaak Yesu Krisi ve tileep ila tooni, ve igham mulin zi gha

* **2:3:** 2Tim 1:8, 4:5 * **2:5:** 1Kor 9:25+ * **2:6:** 1Kor 9:7, 10

* **2:8-9:** Ro 1:3; 1Kor 15:4; Pil 1:12+; Kol 4:3

tileep tomania Maaron ila mbonari loolo taghon taghon gha ila. *

¹¹ Saveeᅇ tau naghe nasavia, ene onoon mon. Irau taghur ila kat:

“Isaav ighe iit tapaak Krisi pa mateegh tooni, ene pale taleep mataan yaryaare tomania.

¹² Ve isaav ighe tayooz ariaaᅇ ve tabaad patañani pa i eeza,

ene pale itija Krisi tagham pooz.

Eemon isaav ighe taghur muriin pani ve tapaisamun eeza, i aat ighur muuri pait, ve ipaisamun ezaan paam. *

¹³ Saawe siriv, iit tataghon saveeᅇ mbuaaᅇ toit tomania Krisi mako.

Eemon i, o itataghon saveeᅇ mbuaaᅇ tooni irau saawe.

Pasaa, ᅇgar tooni igheen pataghaaᅇ ta muuᅇ ve ilam. Irau itortoora mako.” *

Timoti irau imin uraata poia ee to Maaron

¹⁴ Saveeᅇ tsiau tane, yau naghe yo upaburigin tamtamon ᅇgar toozi pani irau saawe, leso matazi kisini. Ve avom iyaryaᅇ pazi ila Maaron maata, leso tivazorai zi pa saveeᅇ soroksorok sov. Pa saveeᅇ tauvene, ene irau iuul ghiit rigta mako. Ene ivaghamunia yes tau tiloᅇlooᅇna na. *

¹⁵ Uzuari ghom le uraat tsio isov iduduᅇᅇ mon ila Maaron maata. Ve uvotia dudunai saveeᅇ onoon pa tamtamon itaghon ᅇgar to Maaron. Leso

* **2:10:** Kol 1:24 * **2:12:** Mt 10:33; Ro 8:17; 1Pe 4:13 * **2:13:**
 Nam 23:19; Ro 3:3+; 1Kor 1:9 * **2:14:** 1Tim 6:4; Tit 3:9

mayam ila i maata sov, ve ighit ghom ighe yo uraata tooni poia ee.

16-17 Saveeñ soroksorok to taan tau tamtamon avozi berberia pani na, uleep soghan pani. Pa saveeñ tauvene pale ipaghau tamtamon pa eez to Maaron, ve tila tila le tisaghat kat. Ene imin moroghoon saghati tau ivot imin tiina le ivaghamunia tamtamon gha tisaghat. Zeran ru tau tisasavia saveeñ tauvene, ene Imeneus ve Piletus. *

18 Yesuru tipul eez to saveeñ onoon wa. Pasaa, tivovotia saveeñ karom pa tamtamon tighe: Burigiin to yes mateegha, ene ivot wa. Ve murei, burigiin ite paam muul mako. Saveeñ toozi tawe ivaghamunia tamtamon siriv ghuruun ila toozi wa. *

19 Eemon Maaron ipayooz lupuun tooni izala rir ariaaņa ee, ve ibood saveeñ ziiri ru izala. Ee isaav tauvene: “Maaron iwatagh yes tau timin i le na.” Ve ite isaav ighe: “Tamtamon tisov tau tivotia Yesu eeza tighe i Tiina toozi, ene yes aat tighur murizi pa ngar saghati, ve tileep soghan pani.” Saveeñ ru tane timin ilaal pa Maaron tamtamon tooni. *

20 Ruum tiina, ene gabua maata maata imin uur ve oon tighen ilon ila. Siriv, tigharaat zi pa gol ma silva. Ve siriv, tigharaat zi pa taan ve ai. Siriv, to uraat tintiina. Ve siriv, to uraat soroksorok. *

21 Ene raraate mon pa iit tamtamon. Isaav ighe tamtamon eta ipul ngar saghati ileple, ve igharaat tauu leso ingalaan ila Maaron maata, i pale imin uur patabuyaan tau poia pa ghamuun uraat tinti-

* **2:16-17:** 1Tim 1:4, 20, 4:7; Tit 1:14 * **2:18:** 1Kor 15:12; 2Tes 2:2+

* **2:19:** Yo 10:14, 27 * **2:20:** Ro 9:21; 1Kor 3:12+

ina to Maaron. I aat irau iuul Tiina tooni, ve igham uraat popoia maata maata. *

Ngar tau besooŋa poia to Maaron ighamghamu

²² Tauvene yo uleep soghan pa ngar sasaghati naol tau geegeu tighamgham zi na. Ve yamŋa tamtamon tisov tau tisuŋsuŋ pa Maaron ve tibebes pani toman lolozi ngalaanŋa na, azuari gham le aduduunŋ ila Maaron maata ve aghur ila tooni ari-aanŋ, ve lolomim pa tamtamon ve agham poghani zi, ve alup lolomim imin eemon, ve ataghon ngar luuma. *

²³ Eemon yes tau tikankaan pa Maaron, ve tiyauyau avozi, ve tivavazorai zi pa saveeŋ soroksorok na, upaak zi pa saveeŋ toozi sov. Pa yo uwatagh: Saveeŋ tauvene, ene ipaburigin kokaanŋ ve malmal mon. *

²⁴ Tamtamon tau ighe imin besooŋa to Maaron, ene irau aate yavyav soroksorok ve ikokook ne mako. I aat igham poghania tamtamon tisov ve itotoi ngar luuma pazi. Ve i aat le ngar pa uraat to paduduŋaanŋ tamtamon pa Maaron aliinŋa. Isaav ighe tamtamon tigham saghatini, i irau inoonŋ mako. I aat itatan aate, ve ibaado mon. *

²⁵ Ve ighe tamtamon siriv tizoor aliinŋa, i aat ipaduduunŋ zi toman saveeŋ luuma. Pa ighe igham tauvene, ene pale imin eez to Maaron igham zi titoor ngar toozi, ve ngar toozi ivot gha tighazoonŋ pa saveeŋ onoon. *

* **2:21:** 2Tim 3:17 * **2:22:** 1Tim 1:5, 6:11; Hib 12:14 * **2:23:** Tit 3:9 * **2:24:** 1Tim 3:2+; Tit 1:7+ * **2:25:** Ga 6:1; 2Tim 4:2

²⁶ Leso tighilaal, ve tipas tauzi pa liis to Njeer Saghati. Pasaa, i ta iliis zi pa liis tooni, ve ighamgham pooz pazi, lesa titaghon ngar tooni.

3

Murei, tamtamon pale titaghon ngar saghati

¹ Timoti, yau naghe yo uwatagh kat tauvene: Murei, patanani naol pale tivot. *

² Pasaa, tamtamon pale lolozi pa tauzi mon, ve tighur lolozi kat pa maet. Ve tipapait tauzi ezazi tigha tiliiv zetazna siriv. Ve tisiksik saveen sasaghati pa zetazna, ve tizoor tamazna ma tinazna alinazi. Ngar popoia tau Maaron ve tamtamon tighamgham pazi na, yes pale tighita imin kaut sorok ve lolozi iveghveegh pani. Ve lezi roronin pa Maaron mako. Pale tiveleghe imin kaut sorok. *

³ Ve yes pale lolozi pa tonvetaz toozi mako paam. Isaav ighe atezi yavyav, ene irau atezi izi rekia mako. Pale tikis aatyavyav toozi ariaan. Ve yes pale tingal saveen naol pa zetazna. Ve irau tingin tauzi poi mako. Ngar toozi, ene imin gabua sagsagna. Pasaa, lolozi isaghatin tamtamon rigta mako, ve tivaghamun zi sorok. Yes pale tighur koi pa ngar popoia ta naol ne,

⁴ ve tighur zetazna tila koiazna nimazi. Ve lezi gabizon mako. Tila pa naghozi mon. Ve tipapait tauzi ezazi. Tauvene yes pale lolozi igheen to Maaron mako. Lolozi pa gabua to ulizi mon.

⁵ Yes pale tipamir tauzi tigha titaghon Maaron ngar tooni. Eemon ngar tau tighamghamu, ene

* **3:1:** 1Tim 4:1; 2Pe 3:3 * **3:2:** Ro 1:29+; Jud 18

pale itotoi zi ighe yes tiwatagh Maaron tapiri rigta mako. Zeran tauvene, yo uleep soghan pazi. *

⁶ Tamtamon toozi siriv pale titoova to tilonj tila ruum to yes zilivaa tau lezi ghilaloonj mako na, ve tigham saveenj ngoreenj pazi lesu titaghon zi pa ngar toozi. Zilivaa tawe, tighilaal tigde yes tigham sosor katini ve lolozi ipatañan pani. Eemon irau to tipuli mako. Pasaa, saawe isov, ngar sasaghati maata maata ipapazaagh zi.

⁷ Yes zilivaa tauvene, lolozi tigde le tilonjloonj saveenj tau tamtamon tipaduduunj zi pani. Eemon ngar toozi irau ivot kat pa saveenj onoon to Maaron ne mako. *

⁸ Zeran karomña tawe tizoroor saveenj onoon imin muunj Yanes yesuru Yamberes tizoor Mose. *

Neer Saghati ikau ngar toozi kat, ve tighamgham karom pa ghuruunj ila toozi. Tauta Maaron ighur muuri pazi wa.

⁹ Eemon uraat toozi pale irau ighur geeg mako. Pa ngar tau muunj ivot pa Yanes ve Yamberes na pale ivot pazi paam. Pale titoova le mako, ve eval tiina tighilaal zi tigde lezi ngar mako imin boraña.

Paulus ipalot Timoti muul

¹⁰⁻¹¹ O Timoti, yo upaak ghau kat, ve monmon ituru talaghaagh. Tauvene saveenj tau napaduduunj tamtamon pani, laghoonj tsiau, gabua tau nazuari ghau pani, ghuruunj ila tsiau, gabuag

* **3:5:** Mt 7:21; Tit 1:16 * **3:7:** Tit 1:11 * **3:8:** Ughita Igham 7:11+. Sinainj munjanazi siriv to yes Yuda isaav tauvene: Yes mura to Isip tau muunj yesña Mose tivatovai tapirizi na, tamtamon toozi ru ezazi Yanes ve Yamberes.

tau nayai taug ve nayooz ariaan pa badoon patañani, ve ngar tsiau tau lolog pa tamtamon ve naghamgham poghani zi, ene yo uwatagh zi le isov. Ve patañani naol tau tamtamon tighurghur zi payau ne, ene paam yo uwatagh zi. Muuñ, tigham saghatin ghau kat izi nugh Antiok, Ikonium, ve Listara. Eemon Maaron ipas ghau navot pa patañani naol isov tana. *

¹² Onoon kat, tamtamon tisov tau tipaak Yesu Kriisi ve titaghon dudunai Maaron ngar tooni na, tamtamon pale tighur patañani pazi. *

¹³ Ve zeran sasaghatizi ve zeran karomña tau tipaghau tamtamon pa eez to Maaron na, ene pale tinoknok ghamuun ngar toozi saghati tawe ila ila le imin tiina kat. Tauvene karom toozi pale igherev tamtamon gha tisosor pa eez to Maaron. Ve tauzi tisapir pani paam. Pasaa, tighur ila ngar karom.

¹⁴ Eemon yo irau matam kisin saveen onoon tau uloonja ve ughur ila na, ve utaghoni. Pasaa, yei tau nipaghazonai ghom pa saveen tana na, yo uwatagh ghei wa. *

¹⁵ Saawe tau yo kukuam ve ilam, utum tomania Maaron aliinja patabuyaaj tau tiboode na. Saveen tana, ene irau ipaghazonai ghom pa Maaron ngar tooni, leso ughazon kat pa eez tau i igham mulin ghiit pani. Eez tana, ene tauvene: Isaav ighe taghur ila to Yesu Kriisi ve tapaak ila tooni, ene aat taleep poi. *

* **3:10-11:** Mbo 34:19; Mbanj 13:50, 14:5, 6, 19; Pil 2:22 * **3:12:** Yo 15:18+; Mbanj 14:22; 1Tes 3:3 * **3:14:** 2Tim 2:2 * **3:15:** Mbo 119:105, 130

¹⁶ Maaron aliija isov tau tiboode na, ene Maaron Avuvu ipaburigin tamtamon, tauta tiboode. Saveeñ tooni, ene iuluul ghiit to tapaduduun tamtamon ve tapaghazonai zi pa Maaron ngar tooni. Leso tiwatagh saveeñ onoon, ve tighilaal sosor toozi ve tipuli, ve titaghon ngar duduun mon. *

¹⁷ Tauvene isaav ighe Maaron tamtamon tooni eta iwatagh katin saveeñ tooni, i pale irau kat pa ghamuun uraat popoia ta naol ne.

4

Paulus aavo iyaryaan pa Timoti

¹ Tiina toit Yesu Krisi, pale imuul ilam, ve itotoi pooz tooni ivot ighazon, ve igabiiz tamtamon tisov ve ighur atuya pazi. Yes tau tileep matazi yaryaare, ve yes mateegha paam. Yau avog iyaryaan payo ila yesuru Taama Maaron matazi naghe: *

² Uvotia Maaron aliija pa tamtamon irau saawe. Isaav ighe uleep ila saawe poia ve tamtamon lolozi pa lonjaan ghom, ma uleep ila saawe saghati ve timbuzir pa saveeñ tsio, na yo aat uyooz ariaan pa badoon patanani, ve upaduduun zi poi. Uvotia saveeñ karom ve ngar saghati to tamtamon ivot ighazon, ve avom iyaryaan pazi lesu tipuli. Ve upalot zi to titaghon Maaron ngar tooni. *

³ Pa murei, saawe eta pale ivot, mako tamtamon lolozi pa lonjaan saveeñ duduun tau itaghon

* **3:16:** Ro 15:4; 2Pe 1:20+ * **4:1:** Mbanj 10:42; 1Pe 4:5 * **4:2:** 1Tim 4:13; 2Tim 2:25; Tit 2:15

Maaron ngar tooni ne mako. Taliŋazi pale imonmoon pa loŋaaŋ saveeŋ soroksorok. Tauvene yes pale tiyau zeran karomŋa katini tilam ve tighur zi timin paduduŋaaŋ pazi. Pasaa, yes tiwatagh: Zeran tawe pale tipul zi titaghon tauzi lolozi ve ngar toozi. *

⁴ Saawe tana ighe ivot, tamtamon pale tipoon taliŋazi pa saveeŋ onoon to Maaron ve tighur murizi pani, ve tighur taliŋazi pa sisiŋ soroksorok.

⁵ Eemon yo aat atem imaat ve ugham ngar poi irau saawe, uyooz ariaaŋ pa badooŋ pataŋani, ve uvotia vaaru poia pa yes tau tighur ila soone na. Tinim ibees pa uraat tau Maaron ighuru ila nimam na, ve ugham uratoini le anooŋa ivot. *

Paulus saawe tooni to ipul taan ilam igharau wa

⁶ Pasaa, saawe tsiau to napul taan, ene ilam igharau wa. Malau mako pale sinjig imaliŋ imin vaen tau tiliŋi izala watoonrau paavo. *

⁷ Yau naporav ariaaŋ pa vaaru poia gha naliiv wa. Yau naporaaŋ ghau le rigmon mako napasov parlosaaŋ tsiau tane. Ve ghuruuŋ ila tsiau, ene nakiskisi soone. *

⁸ Tauvene atuya poia to yes tau tiparav ariaaŋ gha tiliiv na, tauta isasaŋan ghau. Atuya tawe, ene vene: Saawe to Mboŋ Murei, Tiina toit tau gabizooŋ tooni duduŋa na, pale ighit ghau ighe yau ŋeer dudunag. Ve yau mon mako. Tamtamon tisov tau lolozi pani, ve tighle le tighita muleeŋ tooni, ene i pale igham ngar raraate mon pazi. *

* **4:3:** 1Tim 4:1 * **4:5:** 2Tim 1:8, 2:3; 1Pe 1:13 * **4:6:** Pil 2:17

* **4:7:** 1Kor 9:24+; 1Tim 6:12; Hib 12:1 * **4:8:** Yems 1:12; 1Pe 5:4;

Syg 2:10

Paulus ipasul Timoti ighe ila ighita rekia

⁹ O Timoti, utoova to ulam rekia.

¹⁰ Pasaa, gabua to taan tane irav Demas maata gha ipul ghau, ve ighau ila pa nugh Tesalonika wa. Ve Kresenes, i ila pa taan sirivu to Galesia, ve Titus paam ila pa taan sirivu to Dalmatia wa. *

¹¹ Ve Lukas zigani tauta yeiru nilepleep. Tauvene naghe ugham Markus, ve yamru alam. Pasaa, i irau iuul ghau kat pa uraat to Maaron. *

¹² Tikikus, yau nambaano ilat pa nugh Epesus wa.

¹³ Nonoghiina tsiau to ngoaan, napuli igheen ila Karpus ruum tooni izi nugh Troas. Saawe tau ughes ulam, mako matam ingali ve ughamu ilam. Ve ugham rau tsiau tilam paam. Ve rau tau tigharaat zi pa ngai uuli na, matam ingal zi kat ve ugham zi tilam. Lolom iveegh pazi sov.

¹⁴ Aleksander tau neer to gharatoon gabua pa mbaras ve ain na, i igham ngar saghati tau ivaghamun ghau kat. Ngar tau ighamu na, murei Maaron tauu aat iyatu.

¹⁵ Tauvene matam imomoos poi pani. Pasaa, i izoor saveen tsiei kat. *

¹⁶ Saawe imin maata tau tipayooz ghau to naghazonai taug pa uraat tsiau, tamtamon eta iyooz murig ve ipariaan saveen tsiau mako. Mako kat. Tisov timoghaagh payau. Eemon yau nasun Maaron naghe maata kisin sosor toozi ve iyatu sov.

¹⁷ Onoon, yau zigau. Eemon Maaron ileep tomani ghau ve ipalot ghau. Tauta navotia katin

* **4:10:** Kol 4:14; 1Yo 2:15

* **4:11:** Mbanj 15:37+; Kol 4:10, 14

* **4:15:** 1Tim 1:20

vaaru poia pa yes tau Yuda mako na, gha tisov tilooŋa. Saawe tana, naghe pale namaat. Eemon mako. Maaron iuul ghau, ve ipas ghau navot ila laion aavo.

¹⁸ Ve yau naghur ila ariaaŋ naghe i aat igham mulin ghau pa ŋgar sasaghati naol isov tau tam-tamon tighhe tigham payau na, ve maata payau poi lee igham ghau nala naleep tomania izi nugh tooni sambam. *

I eeza tiina kat pa tapiri ve poia tooni. Tauvene pakuruuŋ toit aat iŋaruini irau saawe. Ta aazne ve taghon taghon gha ila. Onoon.

Paesiŋ siriv to Paulus

¹⁹ Ugham aaz poia tsiau pa Prisila yesuru Akwila, ve Onesiporus tomania yes tau tileep tomania ila ruum tooni na paam. *

²⁰ Erastus, yau napuli ileep izi nugh Korin. Ve Tropimus, i imorooŋ gha napuli ileep izi Miletus. *

²¹ Timoti, utoova to ulam rekia. Pasaa, malau mako pale nugh isaghat ve yaunŋa tiina ivot.

Eubulus, Pudes, Linus, ve Klaudia, tomania toŋvetaz to Krisi tisov tau yeŋa nilepleep ne, yes tigham aaz poia toozi payo.

²² Timoti, Tiina toit pale ileep tomani ghom, ve poia tooni izaa to yam asov. Onoon.

* **4:18:** Mbo 121:7 * **4:19:** Mbaŋ 18:2+; 2Tim 1:16+ * **4:20:** Mbaŋ 19:22, 20:4, 21:29

**Maaron Saveen Tooni Patabuyaang
The New Testament and portions of the Old Testament
in the Tuam dialect of the Saveeng language of Papua
New Guinea. The Saveeng language is also called the
Mutu language.
Sampela hap Buk Baibel long tokples Saveeng Tuam
long Niugini.**

copyright © 2011 Wycliffe Bible Translators, Inc.

Language: Saveeng (Mutu)

Dialect: Tuam

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-08-31

PDF generated using Haiola and XeLaTeX on 18 Apr 2025 from source files dated 31 Aug 2023

adb844f0-d769-5b05-9dd0-7c01fca938bb